

Mostra

Mirko Insam "The Psychedelic Experience"

Lia Mostra d'Ert - Urtijëi

Vernissage: n sada, ai 11.09.2021, dala 20.00

Dureda dla mostra: 12.09 – 25.09. 2021

Orares de giaurida: 18.00 -22.00

L scumenciamënt

Le creie che l ie n code al scumenciamënt dl mond che ie metù adum da na lingia de numeri y formes geometriches. Chësc code ie scrit ite te n cunzet dl mond dal inuem "Fraktale". Suënz se semieia y se multiplichea chësta costruzions geometriches ngrum de iedesc, belau zënza na fin. Coche jëunn me à chësc cunzet for dassënn apasciunà, davia che ne fovi nia bon de me nimaginé zeche de meifinà? Ciun cunliamënc iel pa danter la matematica y la regules dla natura? Iel pa formules spezifiches che descrisc la vita? Possun pa capì la matematica? Iepa nosta realtà bel determineda? Dut ciche dëssa mo suzeder mesëssa se fé ora aldo de regules dl universum. Purtruëp ne à mo deguni descuviert chësc code. Per prué a ntender chisc pensieres, me ei dat ju n valgun ani cun la reprejentazion de chësc code. La esperienzes dla vita da uni di me à dat l mpuls per me dé ju cun chësta tematica. L ie i mumënc de mi vita che se à dat pro te na maniera ideela, ulache n ie dala drëta ëura sul dre' post, tl dre' cuntest. Chësc me lascia pensé de na vita coche simulazion, davia che tei caji iesun nia boni de sen nimaginé. Y mpo nfluenzea chësta situazions nosta maniera de pensé. N valguna persones chir la risposta sun chësta dumandes dla scienza tla religion y autres se damanda ulache chësta dumanda à abù si uriginn, bonamënter te sé nstëssa.

Pensé do

Una dla dumandes cun chëla che me dei ju, ie l pensé. Da ulà veniel pa y co abinel pa si streda? Co pënsa pa na persona? Possun pa liejer i pensieres de d'autri y iel pa na formula per fé chësc? Iepa i pensieres liedies o se tretel pa mé de pensieres vedli che nfluenzea nosc pensé?


Davia che nosc cervel ne ie mo nia scuvrì defin trata mi pensieres suënz chësc enigma. Da ulache vën l pensé ie bonamënter tan rie d'i, coche descuvrì coche se à fat l universum. La piramida ie per me la maniera plu scëmpla per fé udëi mi pensieres. L prim pensier che ie mei unì pensà ie do mi minonga enc l pensier de uriginn de uni pensier de aldidancuei; da pudëi cunfrunté cun n tram de n lën. Chësc pensier pruvuchea n cunflit de pensieres tl individuum. Dëssi pa ti jì do a chësc pensier o nia. La dezijion spartësc doi puscibleies de pensé inant. Sce n ti va do a n pensier ti dan energia. Chësta dezijion possa pona mo n iede pruvuché n cunflit de pensieres nsci che la dezijion muessa mo n iede unida tëuta. Nsci se nturtidlea nosc pensé, devënta rames y pleces che devënta uni di plu stersces.

Mikrogramm

Per ulëi ti ji do al plajëi ie la puscibltà plu saurida chëla de sostanzes psicoatives. Meche nia me legrëzes, ma ënc tëmes anconten ilò, tla cavernes dl subconscie.

Psichedelica lëura te nosc cervel sui “Neurotransmitter”. Puec microgram lascia liede l hormon Serotonin y Dopamin. Chisc hormons porta sotsëura nosc zitlus dl di, nosta sensazion de fam y nosc sentimënc. Tres chësc prozes possel unì dant de straudëi. Chësta aluzinazions à nce persones cun problems psichics. La realtà ne ie nia plu da udëi y n giata pea dut te n outra maniera. Chësta realtà ne ie nia plu reela, ma la vën vivuda dala persona coche scialdi reela. Chësc nes lascia ntraudëi che la realtà vën for mé vivuda dala persona nstëssa. Deguni ne possa avisa dè ciuna che ie la realtà, sce la vën just raieda da vel vijion o sce pudon for crëier a nosta perzezion.

Chësta mostra ne dëssa nia vester n mpuls per prué ora psichedelica, per chël dal assé rejons de ti sté dalonc. Chësta mostra dà na udleda te chësc mond, zënza ne vester pert. La dëssa mustré su ciuna esperiences audiovisueles che ie puscibles y ciun pericui che ie cunliei. L dëssa vester de sensibilisazion per la jënt che cuiona outra pesones coche mac.



Lia Mostra d'Ert - Circolo

Plaza S. Antone 102

I - 39046 Urtijëi (BZ)

Tel. 377-5936350

info@circolo.eu